

四庫全書

史部

欽定四庫全書

史部

欽定石峯堡紀畧卷首二

中書<sub>臣</sub>張經田覆勘

總校官檢討<sub>臣</sub>何思鈞

欽定四庫全書

欽定石峯堡紀畧

提要

臣等謹案石峯堡紀畧二十一卷乾隆四十九年奉

勅撰甘肅疆界與西域毗連白帽之族錯居內地  
生息蕃衍種類日繁

聖朝統馭四瀛義無岐視列為編戶久等齊民其

間禮拜誦經自行彼教者亦王法之所不禁  
乃不逞之徒倡為新教致有蘇四十三之事  
天弧申討迅速翦除從逆者咸見誅鋤效順者仍  
加涵育

恩威並濟自宜懷畏兼深詎狼子難馴鴉音不改  
罔知懲創自外生成甲辰四月復有田五等  
煽亂之事封疆大吏其初既經理乖方追尊  
黨蔓延復不能仰承

指示迅合機宜致弇獸釜魚暫稽旦夕

皇上乃

特命重臣

密授方畧雲羅四合飛走路窮掃穴焚巢西陲大  
定諸臣敬述始末用紀

神謨其事雖肇於鹽茶廳而逆渠營窟之地在石  
峯堡羣凶授首之地亦在石峯堡用以名編  
紀其實也首為

御製詩文一卷次排比月日凡諸章奏

批答自出師奏凱以及善後諸事宜無不詳列

臣

等伏而讀之仰見

睿照如神先幾制勝在事諸臣凡仰遵

籌策者無不操券而奏功凡稍違

訓示者無不償轅而失律誠所謂

凝神九天之上而

揆幾萬里之外者矣伏考書契以來以兵定天下

者莫盛於黃帝世傳其中機之銘大旨在於  
日中必昃不失其時故能動必應機方行無  
敵今恭讀是編而敬繹

聖論遲速之義恍然見

心矩所周精若權衡驗如影響較諸黃帝所言更  
深切而著明焉豈非萬世武功之軌範哉乾  
隆五十四年二月恭校上

總纂官

臣

紀昀

臣

陸錫熊

臣

孫士毅

總校官 臣 陸 費 墀



欽定四庫全書

欽定石峯堡紀略卷首

天章

御製詩

夏至齋居

廣殿本無暑今年覺有涼自因雨澤足恰適夏朝長引

見不嫌夥客批偏喜忙甘蘭滅小醜

昨據李侍堯奏回匪田五阿渾等復

備新族名色什約夥黨於四月十五日

起事攻破西安

土堡提督剛塔帶兵往捕殺賊甚多并親射斃賊目一

人茲復據李侍堯奏官兵于二十三、四等日兩次打仗殺頭人田介洪、吳二韓二賊匪首犯田五腹中鎗傷在馬營水自刎身死餘賊八九十人奔竄現已添派官兵上緊追趕不日即可肅事弗慶祇慙惶

至避暑山莊即事書懷

嶺度廣仁曉旭殷宮臨避暑敬雲關幾經絕域策耆定

乙亥年平定津噶爾已卯年平定回部及丙申適值潢年平定金川籌畫軍務多在山莊駐蹕屢有詩

池逞鞠頑

今年五月啓蹕來熱河適李侍堯等奏新教逆回田五等糾衆滋擾田五及賊目田介洪

興二韓二等均已就戮餘黨李翳子馬翳子復勾結餘黨竄入馬家堡屢經傳諭該督等嚴防後路庶免賊人

乘間竄逃

兵頓徒稱因阻雨賊逃預計竟翻山

昨據剛塔奏餘賊竄據馬

家堡後因該處大雨軍裝火器潮濕山路陡滑難行現  
拏卡謹守候天晴設法辦理朕彼時即以賊人困守空  
山當防其從山後逸出經嚴諭防守後路并諭李侍堯  
親往督同搜捕詎五月十三日據李侍堯剛塔先後奏  
到初五日差弁探得馬家堡內惟見空營虛設棍棒又  
紀賊匪乘夜從轍家梁翻山遁去等語果不出前所料  
因傳旨嚴行申飭令其戴罪立功迅速  
追拏將賊黨盡數擒殲毋使一名漏網  
豫遊肯此疎幾  
務籌筆忙仍宵旰間

陝甘總督福康安奏洗隆德底店山梁賊匪詩以誌  
事

狂回倡新教潢池煽孽氛綠旗兵多懦是用遣重臣巴

圖魯侍衛速領掃邊塵

甘省逆回田五等倡興新教糾衆滋擾自四月十五日起事至

今兩月該督提等雖屢經殺賊并殲斃賊目田五等而總督李侍堯不早赴軍營督勦提督剛塔不嚴籌邀截又緣營兵丁懦怯無能致賊匪於馬家堡馬營街兩次翻山逃竄復得糾黨肆出於隆德靜寧伏羗之底店鹿鹿山石峯堡等處勾結搶掠因命尚書福康安與領侍衛內大臣海蘭察率領已圖魯侍衛等帶領西安旗兵及徵調寧夏阿拉善等處官兵進勦並

次第發京兵健

銳火器軍統之以宿將威名天下聞

福康安既啓行復先後命大學士阿

桂尚書復興帶領健銳火器營勁旅二千名分隊前進以期迅掃賊氛

雖彼小么麼何足

稱敵人肆掠其罪重迅靖期安民福康安先至旗鼓乃

一新茲福康安已於六月初七日先抵隆德軍營即命傳旨將李侍堯革職戴罪軍前効力剛塔革職

問整頓兵力定期進剿  
逆賊懾喪瞻巢穴保死頻石峯

厥巢穴底店為戶門恃此為守禦蟻聚更蜂屯四路直

進攻

逆賊分竄至伏羌城外即據五砦等處戮三百餘名又據傳玉奏於鹿鹿山殺賊六七十名而底店

及潘隴等山梁均剽有賊營為賊人門戶其巢穴則在石峯堡先是屢經傳諭福康安先洗隆德底店等處之賊再以次搗石峯堡賊巢茲據福康安奏於十一日丑刻挑選奮勇弁兵三四千名分為四路會涼州鎮總兵蘇靈參領阿滿泰帶固原涼州兵由正路進攻總兵策卜坦三品職銜法靈阿巴圖魯章京等帶延綏肅州寧夏兵為一路攻其左巴圖魯參領巴達瑪副將和倫帶撒拉爾舊教回兵為一路攻其右阿拉善公多爾濟色

布騰帶兵為一路攻其傍海蘭察帶領巴圖魯侍衛等在各路誘賊剿殺復令侍衛泰斐英阿福寧領兵往來邀截併分兵於後聯絡放卡又旺沁班巴爾帶寧夏滿兵阿拉善兵在大兵後策應莽古賚催領進剿官兵乾糧并火藥鉛彈並知會五岱同日進攻福康安仍帶領巴圖魯侍衛督催各路指示攻剿機宜一可當

百羣大韃與大賔辰戰至酉申賊衆乃大敗逃竄逆紛

紛營卡奪十餘山梁據以陳

官兵分作四路前追合力截殺至辰刻會齊士氣振

奮鎗箭齊發拜唐阿薩克丹布鎗斃騎馬賊目一人官兵等奮勇追擊殺死賊人二百餘名生擒賊三十餘名奪得賊人所佔山梁賊營四座卡營十餘處器械帳房牛羊糧食無算海蘭察等追趕敗竄餘賊又殺死一百餘名是日官兵即於所得賊營屯劄并於左右山梁放卡駐守搜捕餘賊以清糧道即統兵進攻石峯堡直搗

賊巢此次福康安海蘭察等帶領官兵初次進剿即能迅速掃清底店賊匪可嘉之至因各賞給大小荷包並命查明出力各員弁分晰具奏交部議叙將進攻石峯指日捷音臻

### 賜陝甘總督福康安

庸臣姑息養癰

辛丑年甘省逆回蕪四十三滋事時李侍堯正獲罪在獄念其平素尚能

辦事因棄瑕錄用復授為陝甘總督一切善後事宜責成經理詎李侍堯姑息養癰於四十六年即有邪教回民修理石峯堡之事又於上年五月葺治堅固且敢公然糾眾聚集禮拜寺謀逆一切旗幟帳房器械種種齊備夫逆民蓄謀至三四年之久而李侍堯安坐省城竟同聲噴其始終貽誤實為百喙難辭

邪教倡

回民弗寧是用興師發健銳

本年四月邪教回民田五等於小山起事謀逆時李

侍堯在靖遠逗遛以審辦賊黨為名並不親帶官兵設法勦捕迨賊人兩次翻山逃竄復肆行煽誘擾害良民屢經嚴旨訓飭李侍堯始往軍營彼時即料其必不能辦理妥協因命福康安為陝甘總督同海蘭察帶領巴圖魯侍衛等馳驛先往督辦又命大學士阿桂尚書復興挑選健銳火器營精兵二千名帶往勦賊以期迅速

事遂因易督奠生靈前旌早已奪要地

福康安甫到甘省軍營尙令海

蘭察籌勦進兵路徑即將偵探賊匪擒殺并奪取牲畜器械隨由隆德進勦底店帶領已圖魯侍衛督率官兵奮勇殺賊數百名生擒三十餘名直搗石峯堡所調各路官兵亦俱到齊聲勢壯盛四面圍堵賊眾設法進攻斷其水道賊勢窮蹙已似釜魚檻獸計日可殲除淨盡該省民情安貼惟慎籌善後事宜永期綏靖耳

一

路真稱臨福星善後猶應慎籌畫聽無聲勉視無形



大學士阿桂陝甘總督福康安奏殲擒石峯堡賊回

淨盡誌事三十韻

邪回倡新教略經數年矣厥有馬明心回民倡禍始僧  
之一炷香道之五斗米本欲歛貨財遂至兵戈起明心  
被人訐拘繫圉園裏而蘓四十三竟敢欲救彼彼實薩

拉爾番回而已耳

辛丑三月蘭州撒拉爾番回蘓四十三等因救馬明心殺官拒捕佔據河

州城旋竄省城外之華林山命大學士阿桂等往勦首  
逆蘇四十三於六月十五日授首至七月初六日餘黨

殲除悉盡詳見  
辛丑年誌事詩

興兵旋勦除謂其類盡已赦過李侍堯

實資能經理明練夙著名孰謂債轅是偷安一切怠養

癰近尺咫

辛丑年蘇四十三滋事時李侍堯殺罪繫獄因其平素尚明練曉事加恩赦宥復用為陝

甘總督責以經理善後事宜詎李侍堯姑息養癰致邪教回民田五等復糾眾謀逆田五等係內地回民近在咫尺尤非撒拉爾番回可比乃於四十六年逆回等修理石峯堡且聚眾禮拜寺謀逆李侍堯均毫無覺察及田五等起事肆逆李侍堯復逗遛靖遠並不親督官兵速行勦捕以致賊人兩次翻山逃竄糾黨肆逆寔為始終貽誤田五明心徒復讐謀亂詭據阿桂福康安奏獲賊父據供田五係馬明心之徒因欲與馬明心報仇於本年三月內令李自黨父子糾人入夥約於五月初五日起事謀逆嗣緣被人告發所以四被創雖自戕應者如月十五日即從小山起事等語

蜂蟻遂不可紀梳流言滅回邇以故應者衆攻城劫閭

里

賊首田五雖於五月內被創自戕餘黨李鬍子馬鬍子復以流言恐嚇聲稱官兵欲殲滅回衆勾結黨與

于通渭隆德靜寧伏羌及鹿鹿山底店石峯堡等處肆出滋擾嗟我遭燹民蠲租早頒

旨

逆回滋擾地方先經降旨今該督查明被難良民酌量撫卹並將該省本年應徵錢糧全行豁免自此民

情大定並有鄉村百姓縛送逸出賊匪紛紛擒獻者

民情遂大定縛送賊比比更

因遣重臣勇將進兵駛底店折賊鋒石峯圍賊壘

甘省逆回

之事李侍堯剛塔不能辦理因命福康安為陝甘總督同海蘭察帶領巴圖魯侍衛等馳往福康安甫到隆德即進勦底店奮勇殺賊數百名生擒三十餘名賊勢先已挫折後路肅清隨直搗石峯堡而阿桂所率之八旗

勁旅亦至因四面設卡層密環圍瀋掘壕溝斷絕水道賊已如釜底游魂剋期殲滅防竄周濬壕

威命亟斷水猶慮如華林成羣鬥以死茲乃得生口盡

善仍盡美

阿桂福康奏石峯堡賊人自斷水以後晴霽數日情甚惶急七月初三四日陸續投出

男婦一千五百餘名初四日晚福康安同海蘭察等及巴圖魯侍衛率領各營奮勇官兵阿拉善兵屯練降番於石峯堡卡隘之外層層分布埋伏至子刻賊首張阿渾同場填四等率賊向外直撲大通阿渾帶賊在後接應思欲奪路逃竄我兵鎗箭如雨盡力截殺維時海蘭察即率同泰斐英阿福寧阿滿泰春寧帶兵馳往自外層層圍裹痛加殲戮福康安於各路督催明亮保寧成德圖桑阿額爾恒額法靈阿蘇靈等各見賊即截殺賊匪自相踐踏黑夜力戰直至寅刻殺賊千餘屍積滿壕縱橫遍地張阿渾被我兵射傷復與大通馬阿渾等竄

同堡內至黎明福康安同海蘭察明亮等帶領各路官兵一擁直上復興旺沁班巴爾等督率官兵進堡搜捕擒殺將賊首張阿渾即張文慶大通阿渾即馬四娃及賊目楊填四黃阿渾即黃明馬建成馬良茂馬金玉楊存義馬建幾馬建業馬保等全數擒獲又生擒賊七百餘割取首級八百餘計兩日內共殲擒回二千餘掣獲首從逆犯及婦女孩穉三千餘所獲牲畜糧食器械帳房無算此次勒滅賊巢成功迅速大學士公阿桂加一輕車都尉世職福康安晉封嘉勇侯海蘭察加一騎都尉世職五岱授為都統並予騎都尉世職旺沁班巴爾加一公職銜與其弟其餘在事出力之大臣官員及巴圖魯侍衛等均令阿桂福康安查明分晰具奏另降諭旨甄叙其軍機大臣和珅加一輕車都尉世職餘俱著交部以軍功議叙

返躬審為政勉愛民如子弊吏首以廉亦鮮饕餮簞水旱莫不賑肯令溝

整委數

上聲

節可自信實未應有此彼回本吾民奚曾少

異視而忽逢此變斯誠劫數爾究緣化未淳慙愧惟責  
已更憶聖經云哀矜而勿喜

御製文

遲速論

今春為南巡記亦既詳論宜遲宜速之機大抵於兵事宜速河務宜遲而要於敬

天明理非漫論也蓋屢省而有得於己之言也歸而有甘肅逆回田五之事彼時以為盜弄潢池不過藉邪教以惑人心如五斗米一炷香之類地方官自能平之頗不芥於懷既而思之不芥於懷或既違敬明之義得毋有

所失乎已而剛塔有小勝之報李侍堯有坐守之乖以

致賊徒翻山而遁餘黨蔓延猖獗肆擄民居攻縣城自今

年四月南巡迴蹕日即有甘省逆回田五等復偕新教名色糾衆滋擾提督剛塔帶兵往捕田五鎗傷後自刎

賊目田介洪吳二韓二等均已就殲乃剛塔武夫無知李侍堯不早赴軍營調度督勤致餘黨李鬍子馬鬍子

等於馬家堡馬營街兩次翻山逃竄因復糾黨張文慶馬四姓楊填四馬文熹等四出攻犯隆德縣靜寧州通

渭縣伏羌縣城於該處之底店虎虎山石峯堡等處肆行搶掠賊勢遂致蔓延西安巡撫畢沅

遂有徵兵防守之義蓋恐秦隴煽動不可收拾朕閱所

奏即硃批以為若汝所議雖十萬兵不敷用又將何以



滅賊乎

西安巡撫畢沅因見回匪猖獗恐秦隴煽動請於各處要隘分兵堵塞使其無路奔竄等語畢

沅書生之見未嫻軍旅朕謂用兵在扼其要而折其鋒苟不殲厥渠魁東西抵禦何益因即批諭如汝所籌十萬兵亦不數用又何以滅賊擒穴乎然知李侍堯剛塔畢沅及本省綠旗

兵不能了此事即降旨用福康安為陝甘總督同海蘭察領乾清門巴圖魯侍衛章京等二十八人馳驛先往並調阿拉山蒙古兵一千四川降番兵二千寧夏滿洲兵一千撒拉爾老教回兵一千及甘涼兵二千延綏兵一千共兵不滿一萬又命大學士阿桂領健銳火器營

兵二千以為後勁福康安一臨底店即與海蘭察等率先至之寧夏阿拉山兵二千立挫賊鋒逼之入石峯堡福康安至隆德軍營即與海蘭察率先至之寧夏阿拉山兵進剿底店奮勇殺賊數百名生擒三十餘名賊勢膽落後路肅清餘賊追逼入石峯堡於時諸路大兵雲集直搗石峯堡賊策而阿桂所率之八旗勁旅亦至因四面設卡層密環圍審掘壕溝斷絕水道不十日間賊匪殲戮淨盡將賊首張文慶馬四娃楊填四等全數生擒與先獲之馬文燾等一同解赴熱河於是諸路兵陸廷鞠分別斬磔以申國法而快人心

續畢集而阿桂所領之京兵亦到周圍築柵困之斷其水路不十日而淨殲餘孽生獲渠魁此又南巡記所謂

宜速而莫遲未致昧事機而無成也夫兵凶戰危且予  
老矣豈更樂於用兵而有窮黷之為然事機之來應之  
不速設果致賊氛蔓延全秦煽動如畢沅之所慮者豈  
不貽笑無窮而予肯辭以老坐視弗理乎予更思之勝  
國之兵即今之綠旗兵也而其訓練或尚不如今之綠旗  
其董事之臣似今之李侍堯剛塔畢沅者或亦少矣文臣  
掣肘於中武臣作偽於外其君付之不問弗如是則我皇  
清何以得有明之天下乎雖然是宜監宜懼而不可恃

天之寵以自矜且即小可以喻大最爾逆回設非應之速而剿以淨其害有不可勝言者始之一念之忽予深自以為過繼之一念之敬仍蒙

天祐而速歲功則是遲速之論可以默置而弗以明示子孫乎可弗以前明為戒而急於敬

天暗於明理而弗慎於用兵乎用兵固貴速而不敬不明未有弗致債事者是予所以惓惓也

欽定石峯堡紀畧卷首

欽定四庫全書

欽定石峯堡紀畧卷一

乾隆四十九年四月二十二日丙午固原提督剛  
塔奏言臣於閏三月十八日自固原起程查閱河  
州一帶營伍四月十六日午刻途次鞏昌接據臣  
標中軍叅將李良輔等稟稱四月十三日未刻據  
署靖遠協八營守備千總馬忠奇稟報韓家寨回  
民李化玉李自黨等朋夥聚衆私作邪教約於四

月十六並五月初五等日自紅灣渠起事旋據紅  
灣渠保正李應得李芝本首報本庄李自黨招留  
馬尾川回民五人及河州馬回回等隨從新教小  
山地方回民田五聚衆通謀私造庫刀銅鞭號褂  
等物查小山離八營一百三十里係廳屬西安  
州汎地即派前營遊擊薩炳阿帶領五營兵三百  
名于十三日亥刻前往三營屯駐以防不虞叅將  
即于次日帶兵二百名自固原星赴三營據署西

安州都司王宏毅稟稱田五等聚集百餘人滋事  
擾害已傷百姓一二人叅將即將原帶兵丁令遊  
擊薩炳阿帶領前赴鹽茶廳守護並移知固原城  
守營遊擊王化臣再派兵五百名星赴鹽茶廳以  
備撥遣十五日戌刻接鹽茶廳來扎西安州城堡  
已于十五日被賊攻破即令右營遊擊高人傑帶  
兵三百名前往等情臣接閱所稟即星夜馳赴該  
處相機妥協辦理奏入

上命軍機大臣傳諭陝甘總督李侍堯固原提督剛塔  
陝西巡撫畢沅曰甘肅逆回新教自前歲大加懲創  
之後田五等復敢私起新教糾夥聚衆甚至傷害百  
姓攻破城堡不法已極自係前因人數衆多搜捕未  
淨所致即應迅速勦捕以靖地方但此案係內地回  
民非撒拉爾可比尚易撲滅蘭州距該處甚近李侍  
堯接據剛塔咨移自已馳往會同妥辦李侍堯係能  
事之人剛塔及各鎮亦多係久歷戎行似此小醜跳



梁無難即速擒捕況此案係舊教回民稟首可見舊教回民原知安分守法李侍堯等查辦時務須明切曉諭慰安舊教其新教不法之徒更可搜除淨盡李侍堯等總以迅速擒捕毋使蔓延滋事至西安州止係城堡賊匪亦不能久佔滋擾萬一有須調集兵力之處現已另降諭旨傳知傅玉莽古賚先期預備並著傳諭畢沅不動聲色一體預為籌辦以備調用

同日

上命軍機大臣傳諭西安將軍傅玉寧夏將軍莽古賚  
曰據剛塔奏固原新教回人田五等聚衆滋擾該處  
與西安府相距不遠而離寧夏尤近亦當預為籌備  
著傅玉莽古賚酌量各派兵數百名俟李侍堯咨調  
時即作速帶兵前往應用至揀派此項兵丁須慎密  
辦理不可過涉張皇

同日陝甘總督李侍堯奏言四月十五日接據平  
慶道沈鳴臯稟稱固原州屬韓家寨回民李化雄

首報馬尾川回民李化玉李化有李折拉李芝欽  
李良振官代李自黨等及小山回民田五糾衆滋  
事等情職道即親往該處確查辦理並據叅將李  
良輔等具稟前來臣查甘省自前年勦捕逆回大  
加懲創之後經臣隨事整頓有犯必懲各處回民  
無不畏懼

天威守分安業臣去年查閱營伍所過河州固原等處  
地方留心察看回衆情形均極寧謐似不應有聚

衆為匪之事惟是甘省本係回民雜處之地其固  
原鹽茶一帶回族尤多雖經大加懲創而其中陽  
奉陰違愍不畏死妄思滋事者亦難保其必無臣  
即帶同臬司陳步瀛前往該處察看籌辦奏入

上諭曰勉為之料不如撒拉爾之滋事惟應以速以嚴  
二十四日戊申李侍堯奏言臣于十六日自省起  
程十七日子刻途次接據平慶道沈鳴臯等稟稱  
小山回民已經起事戮傷百姓一名衙役一名西

安州營土堡已經被賊佔據等語又接提臣剛塔  
扎稱途次接到提標叅將李良輔之稟即兼程前  
往并已調各鎮營兵協勦臣查該提督就近所調  
之兵已有二千餘名其餘各提鎮除甘州肅州西  
寧相距遙遠外其涼州寧夏官兵已經臣檄調至  
河州係回民較多之地該鎮官兵不便檄調臣已  
飛札該總兵哈當阿令其留鎮彈壓至靖遠係省  
城門戶自鹽茶一帶赴省所必由不得不預為防

範臣已飛飭臣標將弁派兵六百名星赴靖遠協同防護如該處無須防守即可順途前赴西安州會同撲勦臣仍連夜赴固原鹽茶等處會同提臣督率辦理奏入

上命軍機大臣傳諭李侍堯曰小山回民聚衆私立邪教攻破城堡看來此等小醜不但不似撒拉爾之蕪四十三并非王倫王伏林之聚衆滋事者可比今既竄伏西安城堡若官兵四面圍截自無難立時撲滅

現在李侍堯剛塔已親赴該處相機辦理且各處所調之兵已有二千餘名儘足擒剿但甘肅逆回新教自前歲大加懲創之後為時無幾乃田五等復敢私起新教糾衆攻佔城堡不法已極著傳諭李侍堯即督率官兵迅速擒捕審明後必須盡法殲除務淨根株不可藉稱脅從稍存始息使堯頑得以漏網

二十五日己酉李侍堯奏言臣于十八日途次接據平慶道沈鳴臯稟稱回匪李化玉等現已藏匿

化山其倡立新教之首犯田五亦竄回山內現在  
叅將李良輔遊擊薩炳阿高人傑帶兵前往堵截  
擒拏等語查賊回起事傷人佔據西安州營蓋緣  
西安營係鹽茶廳地方都司王宏毅先經帶兵前  
往守護城垣倉庫堡內並無官兵該犯等得以乘  
空竊據惟是賊匪初在鹽茶城外傷人明知城內  
有倉有庫捨而不攻轉退至三十里外竊據無倉  
無庫之空堡旋復棄去散入山中看來田五等原



欲復立新教誘人滋事因首告有人又聞官兵前來擒拏是以倉率舉動尚無成算今賊人現已竄回山中官兵上緊擒拏自不致勢成岌負所慮該犯等蓄謀已久恐別處回民誘入新教匪徒串通勾引臣現已密扎附近固原鹽茶之靈州靖遠靜寧平涼隆德會寧等州縣及河州西寧回族較多地方留心防範預遏奸萌

同日剛塔奏言臣于四月十八日戌刻到固原據

署靖遠協副將玉柱稟稱確查賊人有三百餘名  
攻開西安州城門搶去軍物馬騾扎死兵丁二名  
民人七名賊衆由雞窩山沙溝店子一帶劫搶民  
人牲畜及搶去年壯民人前往西北地方署副將  
即同遊擊高人傑帶領兵丁三百七十名前往追  
勦臣查雞窩山沙溝店子地處西北逼近蘭州一  
面飛咨督臣李侍堯派兵堵禦嚴拏一面行知各  
營敬謹防守外臣即帶兵二百名馳赴前途追拏

查辦均奏入

上命軍機大臣傳諭李侍堯剛塔曰據剛塔所奏現在賊匪不盡竄匿山內尚有逸在他處滋事者與李侍堯所奏情形不符固原鹽茶廳一帶回民較多賊匪既竄往雞窩山等處恐有潛相煽動糾約入教情事該督等務宜迅速帶兵堵截擒拏勦捕淨盡至此案田五等復敢倡設新教糾衆滋事究係從前李侍堯未能殲絕根株以致復萌餘孽自難辭辦理不善之

咎而此時緊要關鍵總以撫安舊教為主所有稟首  
之李應得李化雄應酌量賞給外委虛銜頂帶以示  
獎勵

臣等謹案甘省自撒拉爾逆回滋擾之後新教  
匪徒業經重加創治封疆大吏若果乘此剷除  
淨盡永杜亂源何致牙枿復萌仍有倡教糾衆  
之事乃未逾三載而內地回民遽興構煽是督  
臣之辦理疎漏誠莫逃

聖明洞鑒至賊由西安州入靖遠境勢漸蔓延

皇上于奏報竄往雞窩山時即

諭迅速擒拏堵截

先幾炳燭早已慮患于未形矣

同日李侍堯又奏言據署鹽茶同知敦柱稟稱聞賊匪在西安州營滋擾後即糾夥轉赴新堡一帶搶掠等語如所稟果實是賊人不盡竄回尚有逸在他處滋事者應即飭派將弁帶兵追拏再該署

丞于小山地方搜得賊匪已將首犯田五之兄田友并夥犯李福張得有等夥獲收禁又據平慶道沈鳴臯稟稱盤獲新教回匪馬海龍之子馬買篩子供伊父亦係順從田五往來化山聞現在賊夥有數百人打造刀矛等語但其年甫十三童稚之言恐難憑信統俟臣抵固原逐加嚴訊自可得其起事根由及夥黨確數奏入報

同日陝西巡撫畢沅奏言四月十八日准固原提  
臣剛塔咨稱甘省鹽茶廳屬小山等處回民田五  
等聚衆滋事將西安州營汛攻破現已調兵一千  
名派委幹練將弁帶領前往勦捕並咨隣近各營  
酌派弁兵一體堵禦截拏臣查鹽茶廳逆回敢於  
光天化日之下聚衆滋事攻奪營汛不法已極現  
聞督臣李侍堯提臣剛塔選領幹練將弁帶兵勦  
捕截拏自必即日就擒第查該處距陝省西路長

武縣一帶不過三百餘里恐各犯因官兵搜捕嚴  
緊星散逃竄潛入陝境臣現已派委臬司王昶臣  
標中軍叅將孫受酌帶兵役星馳前往甘省交界  
長武地方嚴密堵截如遇逆回逃竄入境即行擒  
拏并飛飭路通甘省之各地方文武員弁一體督  
率兵役在要隘處所堵禦巡緝務須不動聲色毋  
得稍涉張皇再甘省勦捕逆回須兵就近協助業  
經固原提臣剛塔將陝省之長武邠州等營兵丁



陸續零星調往自可合力勦除無須再有徵調但  
事闕回匪抗逆而陝甘境壤毗連倘或有另需調  
用自當預籌應援以資協勦查臣標止有額設兵  
一千名現已挑選五百名預備並商之西安將軍  
傅玉副都統明善于滿營並軍標綠營內酌為派  
備一面飛咨督臣李侍堯如其需用俟知會到日  
即迅速遴派幹練將弁帶領前往奏入報

聞

同日陝西按察使王昶奏言撫臣畢沅准陝西提臣剛塔咨稱甘省鹽茶廳屬回民田五等攻破西安州營汛派臣會同撫標中軍叅將孫受酌帶兵役星赴甘省交界長武地方嚴密堵截臣即于本日自省起程前往至所需兵役俟臣到彼後察看事宜如有必需之處再請撫臣派撥前來以資應用再驛傳事務係按察使管理此時文報往來尤關緊要臣于馳赴長武之便即將各驛站馬匹順

聞

道稽查並嚴飭站員上緊馳遞毋致稽遲奏入報  
二十六日庚戌李侍堯奏言臣行抵瓦亭驛接據  
署鹽茶同知敦柱靖遠縣知縣黃家駒稟報有賊  
回一百數十人于十五六等日先在花崖灣民家  
搶奪馬騾扎傷事主後至板窰溝搶奪財物牲畜  
砍傷婦女隨往柴梁新寨小紅溝而去又據署靖  
遠協副將玉柱稟稱賊衆由雞窩山沙溝店子一

帶劫掠即同遊擊高人傑帶兵前往追拏各等情  
是賊匪劫掠滋擾由鹽茶而至靖遠地方該處為  
省城門戶臣前慮及賊匪由靖遠赴省是以奏派  
臣標兵六百名前往協防計日內已抵靖遠正可  
會同該副將撲勦茲臣于二十日卯刻抵固原提  
臣已于本日前往沙溝一帶督拏逆匪臣據平慶  
道沈鳴臯稟稱已將匪犯李化龍李折拉李良振  
并李化龍李化玉之子獲解州城又據叅將李良

輔稟稱遊擊薩炳阿前赴小山捕獲田五之母及家屬并獲夥賊六名及其家屬婦女六十口押交鹽茶同知衙門收禁又署同知敦柱會同該叅將掎獲新教回民李可喜父子二人又西安州營外委王德仁掎獲賊犯二名亦經解赴鹽茶廳收禁又臨洮營兵掎獲回匪馬成千馬進彪解州候訊臣查首犯田五之兄田友先經該署同知稟報掎獲今其母及家屬均已拘掎其餘夥犯暨家屬已

經俘獲者若令解赴固原審訊相隔二百里恐有疎虞查鹽茶廳離小山二十餘里獲犯便于解審且鹽茶西安州大半回民現經滋擾之後臣更須親往彈壓擬即帶同臬司馳赴該處將現禁各犯嚴加審訊則首犯田五現在蹤跡及原糾夥黨究有若干即可向其母兄家屬根究至如馬尾川紅澗壩老鴉溝等處均有賊匪除現往各處搶劫據報稱一百數十人計尚有竄回者又其家屬自必

留于巢穴臣一至固原即已派員帶兵役前往搜捕毋俾漏網至西安州滋事賊匪據署副將王柱查報共三百餘名是否確實尚難憑信計今必有逃竄回巢之犯臣抵鹽茶後即當添派弁兵督率上緊擒拏至雞窩山沙溝店子等處刼搶之賊匪現有提臣前往督率勦捕臣擬暫留鹽茶審辦次第奏

聞奏入

上命軍機大臣傳諭李侍堯剛塔曰回匪田五等由沙溝一帶竄逸不過沿途搶竊且其家口已被挈獲計剛塔追躡賊蹤自無難即時撲滅但此案回匪復藉新教名色滋事傷害民兵恐其易于煽動現在鹽茶衙門監禁多人李侍堯親往審訊所有田五蹤跡及起事緣由均無難徹底跟究著李侍堯于審明後即將現獲各犯分別凌遲斬梟一面奏聞一面正法其案內情節較輕應行緣坐之犯亦不可從寬自應牢



銅監禁于結案後另降諭旨再行從嚴辦理此案關  
鍵總以迅速為主即剛塔此時前往沙溝一帶勦捕  
賊匪亦應速行搜捕淨盡勿留餘孽至平慶道沈鳴  
臯鹽茶同知敦柱及副將玉柱叅將李良輔等于此  
案回匪劫掠情形隨時稟報且能弼獲多人尚屬奮  
勉著李侍堯于此案完結後查明實在出力文武各  
員據實奏明候朕酌量加恩以示鼓勵如有庸懦退  
縮不肯出力者一併據實叅奏治罪如此賞罰嚴明

庶文武員弁知所勸懲

二十九日癸丑李侍堯奏言臣于二十日由固原起程二十二日子刻途次據藩司馮光熊稟稱逆回來攻靖遠城復據靖遠所屬蘆塘營署遊擊蘭發甲報稱回匪約有四五百人佔踞分水嶺于十七日夜間攻擾永安堡天明仍回分水嶺斃賊二人並未傷損官兵等情伏查臣前因賊人在靖遠鄉村搶掠即慮由鄉至城該縣存城之兵先經署

欽定石峯堡紀畧

下三千兵力無虞單弱其靖遠可通省城之小路  
臣亦預飭撥兵堵截臣因鹽茶掣禁匪犯及犯屬  
人數較多現又訊據各犯供出竄歸巢穴之賊隨  
供隨捕均須遣派兵丁現存兵二百名不敷派撥  
臣昨已飛調固原兵二百名星赴鹽茶一面飛調  
慶陽兵三百名就近赴固原協駐茲臣于本日未  
刻抵鹽茶一俟固原兵至擬留臬司平慶道在此  
審辦所獲賊匪兼資彈壓臣即帶此二百名兵馳

往靖遠一路會同提臣勦拏賊匪再臣前檄調省  
城涼州寧夏官兵時即已咨會甘州提臣預備兵  
六百名茲一併咨調并續調涼州兵六百名俾各  
處兵丁四面堵截賊匪無路奔竄得以迅速完結  
奏入

上命軍機大臣傳諭李侍堯剛塔曰賊匪在靖遠鄉村  
搶掠乘夜圖攻永安土堡又復回據分水嶺現已厚  
集兵力四面攻圍勦捕似可剋期撲滅但閱摺內有

各犯供出竄歸巢穴之賊隨即擒捕是賊匪已有沿途竄回者何以尚有四五百人佔踞分水嶺所供數目如果屬實恐賊匪往鹽茶靖遠一帶該處復有新教回民沿途煽誘此次逆回糾衆滋擾總因新教而起究係從前查辦未盡所致將來賊匪盡數就獲時必須痛加殲戮即情節至輕者亦當發遣極邊烟瘴李侍堯辦理此事務宜淨絕根株方為妥善至剛塔前經奏報由固原起程追躡賊蹤現在該提督究至

何處曾否遇賊擒殺何以日來未據奏報著傳諭該提督即將追勦擒捕情形迅速馳奏

三十日甲寅畢沅奏言接准督臣李侍堯自鹽茶廳來咨逆回已由靖遠渡河東路之兵不敷應用飛調臣標兵五百名西安將軍標綠營及滿營兵三千名迅速赴甘策應臣查靖遠距蘭州不過二百餘里逆回已經渡河必須多兵應援不容稍緩臣原預備兵五百名一切軍裝器械早已收拾齊

全即派委臣標中軍叅將孫受帶領起程其所調  
西安滿漢兵三千名亦經西安將軍傅玉副都統  
明善預為挑備停妥即日起程臣并飛飭西路  
各州縣多備車輛馬騾俟各兵到境應付接濟務  
期迅速行走前赴平涼固原一帶以資策應至陝  
省鳳翔延安邠州各屬均與甘省接壤所有要隘  
處所亦須派兵彈壓臣已飛扎興漢鎮臣三德帶  
兵一千名由雲棧前赴鳳翔延綏鎮臣策卜坦帶



兵一千名前赴定邊各交界地方不動聲色嚴密  
堵禦并聽候調用再查陝省西同鳳各營兵丁經  
提臣剛塔陸續調往固原協勦現在存營無幾省  
城滿漢官兵此次調用亦幾及半而陝西幅員遼  
濶回民衆多兵備未便空虛設甘省更須調撥未  
免不敷應用臣已密咨山西撫臣農起在附近陝  
省各營分預備兵二三千名如遇應用即行飛調  
庶不致臨時遲誤仍聽候甘省信息倘可無須即

便停止至臬司王昶前已赴長武一帶督率稽查  
此次西安滿漢各兵起行亦須大員沿途料理臣  
已派藩司圖薩布令其前赴甘省一路往來護送  
以速兵行奏入

上命軍機大臣傳諭李侍堯剛塔畢沅農起曰此次逆  
回聚衆滋擾節經李侍堯等奏報情形尚不至如蘓  
四十三之猖獗況甘肅省城自四十六年以後城垣  
已一律修整華林山又增添營堡各營汛亦俱添設

額兵河州有總兵固原有提督形勢聯絡足壯聲援  
似此小醜跳梁無難尅期撲滅陝甘相距遙遠何必  
紛紛調集多兵徒滋煩擾且該處將軍都統俱已帶  
兵起程藩臬兩司又赴交界地方料理護送畢沅復  
扎派興漢延綏兩鎮各帶兵一千名赴鳳翔定邊等  
處堵禦又復密咨晉省預備兵二三千名候調所辦  
殊屬張皇蓋因畢沅本係書生未嫻軍旅所致現在  
陝省各路官兵業經起程自當聽甘省派撥協同堵

禦其山西兵竟可無庸預備著傳諭農起即行停止  
派撥至陝省各屬回民甚多伊等俱係舊教從前曾  
降旨李侍堯令其明切曉諭慰安舊教嚴辦新教畢  
沅亦應照此辦理況賊人既已西去自無復東回之  
理尤宜不動聲色妥為撫輯

同日西安將軍傅玉副都統明善奏言臣等接准  
撫臣畢沅來咨即簡派滿洲兵二千綠旗兵一千  
預備檄調四月二十五日據督臣李侍堯移咨派

令滿洲綠旗兵三千迅赴甘肅援勦逆回臣等即  
將預行派出之滿洲官兵二千綠旗官兵一千分  
為六起臣傳玉于二十六日攜帶將軍印信率領  
頭起官兵迅速兼程前往其餘各起官兵俱令陸  
續起程末起令副都統明善督催迅速前往酌留  
曉事之協領達春常山率領官兵防守省城仍面  
囑撫臣畢沅所有滿漢官兵暫行總統約束奏入  
上命軍機大臣傳諭傳玉曰傳玉奏接到李侍堯調取

西安兵咨文即將預派兵三千與副都統明善分隊  
帶領前往等語此事甚屬錯誤明善曾經身歷戎行  
所有前起甘省兵丁自應著明善帶往傅玉若自揣  
親身帶兵于事有益即當令明善存留防守今西安  
城中惟有巡撫一人而將軍副都統俱前往甘省並  
不通盤籌畫以期有濟徒為自占地步傅玉于此事  
尚不明悉何以辦事且永安奏請陞見業已起程途  
中聞逆回滋事之信以陞見非甚緊要即奏明前往

固原能知事體輕重傳玉何反不如永安乎著傳旨  
嚴行申飭並諭明善永安知之

欽定石峯堡紀畧卷一



欽定四庫全書

欽定石峯堡紀畧卷二

五月初一日乙卯李侍堯奏言

臣於二十三日接

提

臣

剛塔扎開二十二日聞署副將玉柱守備池

清打仗有傷損兵丁之事隨帶兵前往行至打喇

赤地方二十三日卯刻偵知賊人現來打喇赤堡

內搶奪舖戶提督即帶兵迎勦賊人出堡抗拒官

兵鎗砲齊放斃賊四五十名提督射死騎青馬穿

白衣賊目一人正在督勦間遊擊薩炳阿因帶石傷所領左哨兵丁先行退走提督亦帶箭傷一處隨退至要口堵截忽聞放鎗之聲偵知遊擊高人傑帶兵從賊後趕來佔住土堡前後夾攻殺傷賊人甚多餘賊俱上南山據被掠迺回百姓傳言賊有回撲鹽茶之信又欲往官川糾夥不定等語

臣

昨聞賊匪復至打喇赤計

臣

標調赴靖遠防護之

兵于二十日已到又涼州調來之兵亦即日可抵

靖遠隨飛檄令其酌留弁兵協守靖遠城帶兵五

六百名迎來策應提臣又寧夏之兵即日亦可抵

靖臣現在飛催星速前來協勦竊以賊人果欲赴

官川即當從靖遠而往有路可通何復前來打喇

赤或因夥犯家屬多被拏護收禁鹽茶是以欲回

搶奪亦未可定今鹽茶舊有兵二百名昨臣檄調

固原兵二百名於二十三日亥刻已到此處逼近

賊巢恐賊匪妄思劫奪人犯自應暫留鹽茶彈壓

即使賊人猝至有此四百名兵雖土堡低小尚可  
支持臣昨又續調固原兵四百名計明日可抵鹽  
茶俟此項兵到臣擬酌留官兵守護鹽茶其餘即  
帶領星赴靖遠一帶接應

同日甘肅提督俞金鰲奏言臣准督臣李侍堯來

咨派甘提標兵丁六百名聽候調用臣即照數選  
派預備並密行各鎮營所屬地方嚴加防範嗣又  
接署涼州鎮副將八十五扎稱裴家堡分水嶺一

帶有賊回四五百名執持五色三尖旗號在彼下

營該署鎮即帶兵前往堵禦

臣

查裴家堡分水嶺

乃固原所屬與涼州寧夏界壤相聯旋派本標兵

丁三百名於二十一日率領起身擬往黃河渡口

三眼井蘆塘等處地方堵禦二十二日途次接蘭

州藩司馮光熊扎稱有賊回千餘衆來攻靖遠縣

城督標兵丁恐不敷用

臣

思督

臣

現在帶兵赴固

原等處又派督標兵六百名前往靖遠一帶防禦

存城之兵實屬無多省垣重地最為緊要況與靖  
遠相距僅二百餘里是以臣先帶兵三百名兼程  
赴蘭其督臣檄派候調兵六百名亦飛飭星夜來  
省協同防禦再令本標派兵五百名候督臣檄調  
遣發又飛行肅州鎮令將督臣前檄備調官兵速  
往黃河渡口三眼井蘆塘等處策應涼州鎮官兵  
協力勦捕並令該鎮再派兵五百名以備續調遣  
用均奏入

上命軍機大臣傳諭李侍堯剛塔俞金鰲曰賊匪糾衆  
滋事自打喇赤土堡與官兵接仗後紛紛退據南山  
既欲回撲鹽茶又欲前往官川可見賊匪倉猝糾合  
胸無定見至賊人欲回撲鹽茶自因犯屬多被拏獲  
收禁欲回搶奪李侍堯在彼即應將所獲賊夥犯屬  
審明後即行正法以絕賊人搶救之念至勦擊賊匪  
時遊擊薩炳阿因帶石傷左哨兵丁先行退走綠營  
怯懦惡習殊堪痛恨兵丁見將領受傷理應奮勇上

前救護乃兵不顧將先行退走彼時即應按軍法辦理數人俾衆兵知所做畏現在事雖已過亦應查明首先退走之兵正法示衆以肅軍律現在李侍堯檄調各路勦賊官兵俱已陸續到齊本日又據俞金鰲奏報帶兵兼程赴蘭是西路有俞金鰲哈當阿帶兵堵截東路有西安續調滿漢官兵可資策應李侍堯剛塔乘此兵勢厚集合圍勦捕賊匪窮蹙無難尅期撲滅剛塔奮勇殺賊受有箭傷殊屬可嘉著加恩賞



給御用玉韞並賞給李侍堯剛塔大小荷包用示獎勵其帶兵之遊擊高人傑汪啟果能奮勇出力該督等應存記奏請陞擢

同日李侍堯又奏言新授涼州鎮總兵蘇靈赴任來甘聞臣現在查辦回匪馳至鹽茶謁見臣查該

鎮標現有調來勦賊官兵署總兵八十五業已領

兵前來臣擬令蘇靈即在軍營接印統領赴調之

兵隨同勦賊奏入報

聞

初二日丁巳李侍堯奏言

臣

於二十五日在鹽茶

拏獲賊營逃回之馬伏保親加鞫訊據供官兵於  
二十三日兩次打仗殺賊甚多賊人竄走馬營水  
庄山頂之上二十四日官兵復行趕來殺賊三十  
餘人頭人田介洪吳二韓二先後被殺其餘賊受  
傷不能逃走者俱自縊自抹田五亦腹中鎗傷是  
日午後在馬營水自抹身死埋屍山溝現在頭人

只有李鬍子馬鬍子二人賊衆剩有八九十人已竄往余家溝一帶等語旋據派往追勦之遊擊高人傑富成等稟到二十四日打仗殺賊情形及賊人現竄余家溝緣由與該犯所供符合臣以其言恐難憑信隨詢據鹽茶熟識田五之人繪出該犯面貌扎寄提臣速派將弁前往刨驗茲臣二十六日自鹽茶起程行抵劉家井據守備朱進廷稟稱前往馬營水山溝刨出田五屍身比對所繪面貌

相符割取首級呈驗臣復令獲犯馬伏保辦認亦稱的係該犯除將首級交地方官在小山梟示並將馬伏保正法外伏思田五一犯膽敢私復新教糾夥滋事抗拒官兵不法已極今因受傷自斃而逆黨頭人五犯就戮者三人僅存其二餘賊自必勢成瓦解現在竄往余家溝一帶之賊數十人不過苟延殘喘惟是余家溝係通李羊川官川之路官川為馬明心倡教惑衆地方雖當大加懲創之

後恐匪犯竄入潛匿勾引別生事端不可不迅速

追拏期於根株剷絕

臣

同提

臣

會商即派官兵同

寧夏鎮吉蘭泰帶往官川一帶追趕截拏再靖遠  
城暨永安裴家堡糜子灘滋擾賊匪據報已經逃  
竄

臣

節經嚴飭各將弁上緊追拏俟明日一抵靖  
遠即行添派官兵跟踪追捕

李侍堯又奏言

臣

以鹽茶拏禁賊匪及犯屬甚多

昨于二十五日拏獲賊營遣來探信之田仲悅訊

供賊人意欲回搶鹽茶約人內應之語臣即據其  
供出之人迅於鹽茶城內密拏收禁似此賊情叵  
測自應將各犯早為辦理以免疎虞查田五罪大  
惡極應照蘇四十三之例其犯屬無分男女少長  
一概駢誅隨於二十六日赴靖遠之先將田五之  
母妻子姪女等一十三名口并要犯馬海龍一名  
從賊田仲悅等二十六名暨緣坐犯屬九名共四  
十九名口綁赴市曹分別凌遲梟示處斬訖惟田

五之兄田友因尚有拏獲賊匪現留臬司在彼審訊恐有應須質對之處是以暫行留禁俟續獲人犯審明之日即一併正法奏入

上諭內閣曰前據李侍堯剛塔奏小山逆回田五倡設新教糾衆滋事攻破西安土堡往靖遠一帶村庄搶掠已節次降旨令該督等督率官兵迅速擒捕矣本日李侍堯奏官兵於二十三等日兩次打仗殺賊甚多頭人田介洪吳二韓二先後被殺賊匪首犯田

五腹中鎗傷在馬營水抹脖子死埋屍山溝守備朱  
進廷前往刨驗面貌相符割取首級梟示餘賊剩有  
八九十人竄往余家溝一帶現已添派官兵上緊追  
拏等語逆回田五於光天化日之下膽敢私復新教  
糾衆搶掠抗拒官兵不法已極提督剛塔一聞稟報  
即帶領弁兵馳往剿捕李侍堯亦往鹽茶廳督率查  
拏未及一旬賊首受傷自斃逆黨頭人五犯就戮者  
三人大局已定其竄往余家溝一帶之賊數十人不



過苟延殘喘無難尅期殲滅李侍堯等辦理此案甚屬妥速且鹽茶廳拏禁賊犯及犯屬甚多昨經降旨令該督等先行審明即將各該犯正法以絕賊人窺伺搶救之心令李侍堯於未奉諭旨之前業已籌慮及此將各要犯四十九名即行正法與朕所降諭旨符合足見其能辦事本應予以優叙但此案究係李侍堯前次查辦新教未能淨盡平日又疎于防範所致其功過兩不相掩李侍堯著交部照例議叙其剛

塔奮勇殺賊親身射死賊目並經帶有箭傷前經賞給御用玉韞大小荷包以示獎勵仍著交部從優議給世職以旌勞勇其在事將弁該督等查明實屬奮勉出力列為超等著交部從優議叙其次出力列為一等者交部議叙至此次賊匪糾衆滋擾其口食斷不能自行攜帶必係沿途搶掠焚燒居民受累在所不免並著李侍堯查明被擾村庄如有應行撫卹者酌加撫卹毋使失所副朕軫念體卹之至意

臣等謹按李侍堯剛塔於剿捕賊首田五一事始著微勞即蒙

皇上褒功賞過甄叙有差自宜感激圖報迅速設法邀截擒捕乃僅知尾追逗留旋令賊匪得以縱颺實屬重負

聖恩自干嚴譴至田五受傷自刳雖伏厥辜而逆黨竄逸不免擾累居民

皇上塵切痼瘵

命督臣酌予撫卹毋致失所是以邊氓偶經兵燹而仍安堵晏如也

同日

上命軍機大臣傳諭李侍堯傳玉畢沅曰逆回首犯業經就戮其餘匪犯自成瓦解之勢即使逃竄他處毋難尅日成擒此時自可無需多兵徒滋煩擾所有李侍堯前調各路官兵除山西省業經降旨停止外其所調西安滿漢官兵及畢沅所派興漢延綏兩鎮帶

領各兵並李侍堯檄調甘省提鎮標兵并寧夏涼州  
莊浪各滿兵均著該督等酌量情形足數截拏搜捕  
外其餘應即撤回至現在脫逃逆匪頭人務須督率  
弁兵速行拏獲其餘新教匪黨亦必須殲除淨盡毋  
使一名漏網至上次蘇四十三之猖獗不法因新舊  
爭教互控致起事端即從前王倫倡亂亦由邪教煽  
惑現在逆回田五等斷非無故即能糾合黨羽定期  
起事衆人亦即附和隨從之理或係該處有水旱災

歟貧黎失所以致匪徒從中煽誘抑係地方官勒索苛派擾累閭閻或係預有商謀情事地方官不能早為覺察養癰貽患均不可不徹底跟究現在首犯田五等雖已就戮伊兄田友尚留審訊且續獲餘犯內活口必多著傳諭李侍堯將此事因何起釁緣由詳悉研鞠務得確情據實覆奏毋得稍存迴護之見

初六日庚申李侍堯奏言

臣

自鹽茶起程路過狼

山距官軍與賊打仗之處不過二三里

臣

進山閱

者土岡曼衍亦有土房廟宇民人躲避惟存空舍

臣所見殺死賊匪屍骸約有百餘人次日抵靖遠

城賊匪業已遁逃民人安堵查賊人從該縣板窑

溝柴薪梁一帶搶掠滋擾於十九日直撲縣城約

數百人適

臣

標遊擊富成帶兵六百名於二十一

日入城防護官兵放鎗擊斃賊人并擒獲帶傷之

賊訊出城中內應一百餘人全行拏獲收禁賊匪

旋於二十一日晚間遁去有乘夜渡河者中流沈

溺賊舟二隻尚存二百餘人過糜子灘搶刦鋪戶脅令漢民展廷隆入夥不允將伊父子五人及其鄰佑一人殺害二十二日復至三角城搶奪馬騾三十餘匹即由河岸南渡往馮家園二十四日早間復有四五十人在車道溝奪船順河流而去現尚有藏匿鷹窩石之賊匪及其家屬此賊人在靖遠攻城後流竄之踪跡也又賊人前由永安堡佔據分水嶺經守備張昇領兵殺賊追至裴家堡殺



賊十餘名并拏獲家屬六十餘名是永安裴家堡

此時亦無賊踪

臣

現派署涼州鎮八十五帶兵先

往鷹窩石三角城一帶分路追捕俟甘州赴調之

兵一到再行添派截拏至賊人奪船順流而下即

係中衛地方

臣

已飛飭寧夏道派撥弁兵於沿河

一帶堵拏

臣

仍暫留靖遠調度官兵督率辦理奏

入

上命軍機大臣傳諭李侍堯曰此案賊首已殲餘黨竄

散現已添派官兵截拏追剿所有賊人頭目馬鬍子  
李鬍子務須迅速擒捕審明正法不可復令竄逸自  
戕倖逃顯戮至賊匪滋擾靖遠時城中竟有回民內  
應實屬罪不容誅所有拏獲一百餘犯李侍堯於訊  
明城匪踪跡後將各犯即予駢誅以示懲儆至漢民  
展廷隆父子及鄰人等因不從逆回俱被殺害情殊  
可憫著李侍堯查明賞恤

同日李侍堯又奏言

臣

前在鹽茶連日督同臬司

審訊現獲賊犯將田五等如何起事根由向該犯之兄田友及各夥犯詳細研究緣田五即田富係小山回民曾從馬明心學習新教自蘇四十三肆逆之後經官嚴禁該犯仍私行傳習復有紅滂堤回民李自黨界牌庄回民馬海龍相與招集徒黨如馬尾川中灣老鴉溝黃羊坪灘白季村等處俱有隨伊新教之人轉相煽誘人數漸多該犯等遂蓄逆謀於去冬今春間製辦矛子庫刀韌鞋等物

并製白布號褂以示不忘馬明心之意原約七八月間庄農收穫之時聚集多人不招疑惑即可訂期舉事適被馬尾川民人李化雄紅滂垵鄉約李應得于四月十二日赴營出首經文武官會同查拏田五聞信遂率領徒黨突于十五日在鹽茶城外傷人并乘虛搶入西安州營擄掠旗幟軍械殺害兵民沿途糾會新教黨羽搶掠村庄向靖遠一帶滋擾抗拒官軍

臣

竊以該犯等倉猝舉動糾約之

衆未齊是以人數無多今其餘黨紛紛竄散官兵  
躡跡追拏無難撲滅惟是新教誘人回民易於煽  
惑馬明心誅戮未幾復有愍不畏死如田五者幸  
而首告有人先期敗露查固原鹽茶回民本居大  
半而小山一帶各村庄尤為新教之藪現在已經  
拏獲之犯於其家內起有刀矛軍械其被首未拏  
之犯人數不少隨供隨拏如有村庄較大回衆較  
多之處擬派將弁帶兵會文員前往傳諭鄉保指

名擒獻倘有抗拒逃竄即行撲剿以期剷淨根株  
奏入報

聞

初八日壬戌李侍堯奏言

臣

於二十八日抵靖遠

查得賊人由糜子灘遁至鷹窩石約有二百餘名

挈其家口竄伏山梁該處山勢臨河峽路險窄藉

為隅負并預奪民船泊於峽口以備順流潛逸

臣

即派署涼州鎮八十五

臣

標遊擊富成先後帶兵

一千名前往剿捕囑令在沿山對岸之處擺列砲位轟打賊船斷其水路并於沿河伏撓鈎木筏以備截拏並探明山路分兵再繞其後以期撲滅適因連日大雨難以進兵臣飭令把截隘口俟晴霽即行政勦至提臣前赴官川一路連日接准札稱探得賊人現在馬家堡黑庄兩處屯聚約有一千餘名正在派兵進剿間適遇大雨軍裝火器不無潮濕現今將器械整飭烘烤完妥再為前進並湏調

取官兵接續以為必勝之計等語

臣

查前調甘州

官兵據提

臣

俞金鰲知會先來六百名初二日准

抵靖遠又西安滿漢官兵計日已在平涼一帶已

咨會俞金鰲帶領現到之兵星赴官川為剛塔後

路接應并飛咨西安將軍傅玉速撥滿漢兵一千

五百名又行催撫標兵五百名從會寧一路星赴

馬家堡黑庄會合提

臣

剛塔之兵合力攻剿統計

所添之兵與原帶之兵不下五千或過其前或躡



其後俾賊匪無路分竄自可尅期殲擒奏入

上命軍機大臣傳諭李侍堯剛塔曰前據李侍堯奏賊首田五已殲餘黨竄散官兵截拏追剿朕意此時自當早已完結本日又據奏到馬家堡黑庄兩處賊匪屯聚約一千餘人現調取官兵接續以為必勝之計等語此案賊首業經殲斃官兵所殺之賊又有數百名乃此時尚有千餘賊衆自係田五斃後其餘賊李鬍子馬鬍子又復隨處勾結脅誘可見新教煽惑人

心牢不可破必當絕淨根株勿留餘孽至此時西安及甘州寧夏各處官兵俱已調集四路進剿堵截總宜迅速辦竣勿使再有蔓延方為妥善

初九日癸亥剛塔奏言

臣

於二十八日自劉家井

帶兵前往官川於三十日到郭城驛探得賊回佔

據頭寨子黑庄子等處

臣

即派遊擊汪啟皂王保

等帶兵迎擊賊衆見官兵到來俱退入山內汪啟

等將頭寨子黑庄子分兵佔據探得賊衆現在馬

家堡地方查馬家堡係在大山之內須遶溝進剿  
又大雨如注路險道滑兵丁難以行走現在拏卡  
駐守俟天晴設法辦理等語臣同寧夏總兵吉蘭  
泰涼州總兵蘇靈帶兵亦到頭寨子在要路口拏  
營堵防自二十九日亥刻大雨至五月初二日寅  
刻止河水漲發路渾泥深綠營步行兵丁甚多恐  
其難進暫行拏卡令兵丁收拾器械即設法進剿  
奏入

上命軍機大臣傳諭李侍堯剛塔曰據剛塔奏賊衆佔據馬家堡黑庄兩處與李侍堯昨日奏到情形相同賊匪雖現據大山官兵難以繞溝前進然賊既入山中四面堵截如釜底游魚株守空山食盡自斃但當嚴密堵截防其別尋路徑逃逸況現在西安及甘州寧夏各處官兵俱已齊集兵力既厚自可設法四路會剿堵截去路無難尅期撲滅再昨據李侍堯奏正在派兵進剿因軍裝火器被雨潮濕現今弁兵將器

械整飭烘烤再為前進本日剛塔亦奏稱兵丁收拾  
器械等語官兵進剿賊匪自必攜帶帳房軍裝器械  
俱應在帳房內收貯非同露處且行軍豈能不遇風  
雨若似此沾濕火器尚可用兵乎況內地皆有房屋  
非若口外可比何致被雨淋濕可見綠營無用全不  
知行軍之道該督等宜嚴加整飭毋任仍前疎畧致  
滋臨陣周章

臣等謹按賊匪屯據馬家堡等處繞溝進剿未

能迅即殲除維時官兵既壓其前即須預斷後路不使喙走稽誅方可一舉歲事我

皇上坐照如神恐其竄由別徑即

諭督<sub>臣</sub>等以四面堵擒

丁寧申誠不啻再三未幾賊果從山後潛遁實緣在事

諸<sub>臣</sub>懵於防範坐失機宜以致復稽時日益仰

先機豫照

睿慮無所不周也

同日畢沅奏言

臣聞督

臣檄調河西各路官兵而

陝西之西同鳳各營兵丁暨西安滿軍標撫標約

共調兵五千名現已全數起程迅速前往日內陸

續可過平涼

臣

復恐甘省東路兵單在興漢延榆

二鎮各調兵一千名就近分駐鳳翔定邊為犄角

之勢以備策應而資彈壓至甘省之涇原一帶與

陝境毗連所有要隘關津俱派委文武官員率領

兵役小心堵禦搜拏以防竄匿奏入報

聞

同日

上命軍機大臣傳諭李侍堯及各省督撫曰昨據李侍堯奏賊匪屯聚馬家堡黑庄等處官兵因四月二十九日大雨軍裝火器被雨潮濕現傳令弁兵將器械整飭烘烤再為前進等語綠營兵丁無用如此已降旨傳諭李侍堯等嚴加整飭矣官兵進剿賊匪自必攜帶帳房一切軍裝俱應在帳房內收貯何致被雨



淋濕從前征剿準噶爾時皆在口外地方並無房屋  
自亦常逢雨雪若如該督等所奏因雨不能進兵則  
彼時軍裝器械又存在何處豈遂按兵不動耶況官  
兵遇雨賊人豈獨不被雨又奚必俟天晴另行設法  
辦理耶李侍堯係曉事之人何以亦聽綠營恇怯之  
語不加檢點率行入告再馬家堡黑庄等處自必離靖  
遠不遠或即係統轄地方該處既有此險隘之區各  
處營卡因何不預行堵截致賊入山屯聚又蹈華林

山之故轍且前據李侍堯奏靖遠協副將玉柱探得賊衆由鷄窩山沙溝店子一帶劫掠即同遊擊高人傑帶兵前往追拏等語玉柱既帶兵由靖遠迎拏賊匪其賊衆係由鹽茶而至靖遠剛塔在後帶兵追剿前後官兵兩路夾攻何致不能攔截任其竄入深山况該處自有地方文武員弁係何府州縣所轄所奏殊未明晰著李侍堯將該處山徑及賊人佔據情形詳悉繪圖貼說呈覽其靖遠協副將玉柱於此事若

果有疎縱之處及該地方官不能早為防範堵禦均有應得之咎並著該督於事竣後查明據實叅奏看來此案皆由文武各官不以事為事平時既漫無稽察迨釀成事端復一味懦怯致賊匪得以滋事久稽顯戮又藉口雨濕軍裝為逗留地步總之兵可百年不用不可一日無備嗣後各省督撫務宜隨時加意整頓勿效文恬武嬉之陋習庶無忝封疆軍務之重寄

初十日甲戌護軍統領五岱奏言臣因換班回京

行至蘭州地方聞逆回滋擾西安州等處督臣李

侍堯已前往靖遠並檄調附近地方官兵伏思臣

仰蒙

聖主厚恩稟宜報効隨於五月初三日由瓦亭驛前赴

靖遠聽候督臣李侍堯調遣協同剿捕奏入

上嘉之

欽定石峯堡紀畧卷二

欽定四庫全書

史部

欽定石峯堡紀畧卷三  
五

中書臣張經田覆勘

總校官檢討臣何思鈞

欽定四庫全書

欽定石峯堡紀畧卷三

五月十一日乙丑李侍堯奏言賊人現聚馬家堡  
適甘州提臣俞金鰲帶領頭起兵六百名於初二  
日抵靖遠涼州副都統圖桑阿帶滿洲兵四百名  
先於二十九日到靖遠臣已令該副都統帶兵二  
百名會同俞金鰲所帶之兵前往接應初四日接  
准提臣劉塔札稱初二日派遣擊汪啓皂王保等帶

兵八百名先行進剿提臣同二鎮帶兵續進是日  
已刻賊匪四五百人迎來抗拒提臣搶佔山坡寧  
夏鎮吉蘭泰帶領左翼涼州鎮蘇靈帶領右翼從  
東西兩山溝衝壓而下開鎗放箭忽有騎馬賊二  
三十名捨命沖突官兵鎗傷賊十餘人搶割賊目  
首級一顆賊即退回馬家堡官軍分駐山坡排鎗  
拏卡截守要路暫息兵力再為相機辦理等語臣  
查俞金鰲圖桑阿所帶之兵合計八百名初四日

必到馬家堡又西安將軍傅玉所帶之兵初二日  
頭起已抵平涼且又飛催作速前進合兵迎剿計  
各路兵齊無難協力殲擒現又飛催涼州肅州續  
調官兵星夜前來如有必須接應之處即可迅速  
前往再查提臣等所帶之兵裹帶炒麵乾糧僅支  
數日該處村庄僻地無處購買自應急籌接濟先  
已飭令地方官備辦運往提督軍營並查附近軍  
營數十里之興靖堡郭城驛均有鄉倉存貯粟米



豌豆<sub>目</sub>已派員前往開倉將應需兵馬糧料按數  
供支不致貽誤奏入

上命軍機大臣傳諭李侍堯五岱劉塔俞金鰲曰賊人  
屯聚馬家堡經官兵剿殺後仍退回堡內看此光景  
賊人既屯聚一處不能四散剗掠轉屬易於辦理此  
時李侍堯在靖遠駐劄不過籌辦糧草事務可以委  
道員等代辦李侍堯竟當前往馬家堡督率調度  
較之劉塔一人在彼呼應更為得力況鹽茶監禁賊回

家屬俱已正法其靖遠內應回民亦經按名拘獲正  
法賊匪現退入山內自不能復至靖遠滋擾即或拚  
命回撲官兵正可就其出巢半路截殺更易為力現  
在賊匪所據馬家堡前左右三面俱係深溝大河官  
兵嚴密圍攻已如釜底游魚困守空山食盡計窮自  
不能長久佔據惟堡後靠山居險防其別尋路徑或  
由山後逸出該督等不可專意在前攻圍疎防後路  
致賊人或乘間竄逸將來虛勞兵力圍守空堡竟成

笑話況馬家堡地方想亦不甚廣濶所調西安甘州等處官兵早已齊集儘可四面圍堵將出路志行截住無難盡數殲除此事最關緊要李侍堯等尤宜加意留心也至李侍堯辦理地方事務素稱諳練而用兵非其所長現據五岱奏明暫留該處協剿從前五岱在西路金川屢著勞績曾為叅贊大臣于行軍事宜最為諳習朕所深悉李侍堯正當委其領兵進剿至賊人屯聚馬家堡亦不過與蘇四十三之困守華林

山情勢相同而賊巢中並無鳥鎗火器又非撒拉爾之以打牲為業者可比官兵鎗箭齊發賊人自不能支但綠營施放鳥鎗往往未見賊衆混行施放一經胆怯則準頭必高此皆平時將領不能訓練嫻習致臨時緩急失宜該督等務宜飭令帶兵將弁詳晰曉諭各兵以鳥鎗弓箭原為殺賊而設若未見賊面先行遠放則交仗時轉致火藥盡而箭矢完無以抵禦如此明白曉諭使知準頭施放機宜自更為得力

此時賊匪已成窮蹙之勢官兵若能迅速殲除固屬甚善萬一賊人尚敢負隅抗拒該督等又宜嚴守前後路徑轉不必存急於完事之見務將賊衆圍截嚴密盡數剿拏勿使一名免脫

同日李侍堯又奏言臣在狼山途次據民人拏送賊營逃回之犯馬全一名嗣抵靖遠查得該地方官節次拏獲並民人縛送賊犯沙英等共二十八名訊明均係曾經隨賊打仗送信糾人因敗竄逸

之匪又前賊匪攻城時官兵拏獲賊犯田重文訊  
據供出城中新教為賊內應之人全行拏獲收禁  
臣督飭蘭州道宋維琦等詳加訊鞠隨審隨辦內  
有哈得成等八十三名訊據供稱田五於今年正  
月內至靖遠掌教哈得成頭人哈彥家商同謀逆  
復立新教令哈得成哈彥轉約城內回民俟起事  
後攻打靖遠勾通內應哈得成哈彥轉向沙耀商  
謀已定于三月十五日衆回人齊集禮拜寺哈得

成哈彥等即將田五糾從新教聚衆謀逆之事告  
知衆人勾令臨期內應衆回民均屬知情臣查賊  
首田五糾衆滋擾罪不容誅而各該犯等或隨賊  
抗拒官軍或知情許為內應均屬從逆罪無可逭  
自當立與駢誅業於審明日先後正法尚有現在  
審訊之犯續行辦理再固原州拏獲逆黨及各犯  
家屬共二十四名口已據臬司稟報訊供明確臣  
即飭委平涼府知府王立柱會同營員監視正法

又馬尾川回民李化玉糾衆往小山入夥實屬黨惡之魁茲于四月二十八日逃竄回家經該庄民人李之兩等擒送臣已飭臬司就近審訊同固原鹽茶陸續拏獲各犯分別凌遲斬梟一併辦理奏入報

聞

五月十二日丙寅李侍堯奏言查賊人自攻搶西安州城堡之後即由沙溝一帶搶掠至靖遠境內



之板窰溝小紅溝等處四月十七日至裴家堡  
永安營滋擾因攻搶永安土堡不克回踞分水嶺  
十九日攻犯靖遠縣城復有糜子灘新教回匪渡  
河接應同犯靖遠迨攻城不克田五率領賊衆走  
馮家園遇守備池清之兵接仗池清失利兵有損  
傷賊人又欲回赴鹽茶於打喇赤狼山一帶遇提  
臣打仗為官兵所敗竄走南山其糜子灘之賊復  
渡河挈其家口由三角城竄踞鷹窩石此賊人兩

路分竄之踪跡也至署副將王柱始聞賊人搶掠  
沙溝之信即於十六日率領千總洪光耀帶兵一  
百五十名往剿探知賊匪已走永安堡即追至漢  
平川十九日與賊打仗失利帶傷並傷兵四十餘  
名為賊衝散因賊踪漸近靖遠王柱先遣洪光耀  
報知備禦一面收集餘兵趕回靖遠趁賊人未至  
之先入城守護適臣標遊擊富成兵至上城防禦  
鎗斃多賊賊隨遁走嗣臣抵靖遠即派署涼州鎮

八十五遊擊富成往剿鷹窩石竄匪並令玉柱同  
往至現在賊人竄聚馬家堡與官軍抗拒且遣營  
弁偵探賊匪在附近村庄搶掠糧食牲畜仍回馬  
家堡查剗塔所帶之兵同圖桑阿俞金鰲續到之  
兵幾及三千臣料賊為官兵所蹙斷無暇前犯安  
定會寧前據藩司調赴安定會寧防守之兆岷協  
兵二百名土司楊宗業兵五百名臣已咨會提臣  
就近檄調又涼州肅州續調兵一千二百名初六

日必至靖遠臣即酌量前赴提臣軍營協剿加以  
西安滿漢官兵陸續踵至計大兵雲集無難一舉  
剿除奏入

上命軍機大臣傳諭李侍堯曰據李侍堯奏到賊人分  
竄踪跡及官兵追賊打仗情形一摺尚係在靖遠拜  
發該督於用兵雖非所長而識見尚為明練若親往  
督率調度較劉塔自為呼應得力且甘肅自逆回蘇  
四十三滋擾後即責成李侍堯斷除新教今復有田

五等謀興新教抗拒官兵之事是該督從前查拏未能淨盡已難辭辦理疎漏之咎况李侍堯在甘業經數年甘省添設官兵較之他省為多靖遠鹽茶一帶在在皆有地方營汛兵弁似此逆回謀為不軌鄉約尚能舉首其弁兵等即或因賊衆不能擒捕豈有生視賊匪經過不行稟報之理又焉用此添設多兵為耶李侍堯一聞賊人起事即赴鹽茶一帶迅速查辦并将賊人家屬拏獲正法辦理亦屬奮勉是以朕

尚加恩賞賚今靖遠既無所事事該督亟宜前往該處  
會同五岱劉塔等相機進剿以期星速完結庶可將  
功抵罪何得安坐靖遠將帶兵調度事宜竟諉之剛  
塔等承辦耶如李侍堯於未接昨諭旨之先已赴馬  
家堡督剿當遵旨逐一妥辦倘尚未起程即當星馳  
前往不可藉詞彈壓竟在靖遠駐劄逗遛以致老師  
糜餉自取咎戾若復使賊人等乘間竄逸該督尤不  
能當其罪也至玉柱打仗失利因兵丁為賊衝散身

亦帶傷聞賊漸近靖遠退回守護其失利之處或尚可原恕至所稱守備池清與賊接仗失利兵有損傷等語若池清並未受傷竟敢隨綠營一同退走是該守備畏賊懦怯以致失利著李侍堯即行查明如果係池清先退失利竟當照從前山東總兵惟一之例於軍前正法以示懲儆即玉柱所帶兵丁為賊衝散此內必有首先奔潰之人亦應查明正法示衆以肅軍紀綠營兵丁向來懦怯究由不能明曉軍律所致

該督等當傳集兵丁向其明晰開導以賊人見官兵剿殺敢于抗拒不動者皆緣賊人自知罪在不赦拚命胆壯爾等各顧身家是以見賊胆怯但臨陣退縮軍律必當正法與其因退縮而就戮不若爭先殺賊成功既可以邀懋賞萬一死事子孫家屬亦可得優卹况未必死於戰而退回者必致死乎如此明白曉諭該兵丁自必咸知勸勵奮不顧身至靖遠城內勾通賊匪商為內應之犯多至八十餘名連該犯等家屬



共有一二百名既係與賊串通許為內應則其心懷謀逆已非一日當被首擒捕之時該犯等強者自必拒捕弱者或奔竄賊巢豈肯安坐城中束手就擒今據李侍堯奏到單內竟似該犯等俯首受縛如此則何異於安分良民殊非情理況奸回欲為內應者甚衆必須多人搜捕始能擒獲李侍堯偵拏此項賊匪時所派何員所用何兵摺內俱未聲叙明晰又固原至馬家堡黑庄等處城堡相距不過四五里之內何

以李侍堯節次摺內聲叙劉塔追躡賊踪之處竟似  
相隔甚遠前後若不相及彼此信息止憑文札往來  
豈李侍堯等不免意存觀望耶從前蘇四十三滋事  
因新教與舊教爭衅地方官辦理不善以致激變逞  
逆事尚有因此案田五因欲復興新教煽誘多人既  
未與舊教仇殺且該省年歲並未荒歉地方官又無  
激變之事賊匪等豈必聚衆倡逆方能振興新教  
其故尤不可解著傳諭李侍堯將所詢各情節據實

詳晰覆奏

五月十三日丁卯李侍堯奏言臣前遣營弁偵探

據報賊人於初二三等日在生樹村石和坪一帶村

庄掠食旋回馬家堡等語臣即札會提臣囑以

軍營哨探最關緊要況賊踪詭秘全憑哨探明確

堵截要隘防其竄逸茲於初六日卯刻接據劉塔

圖桑阿俞金鰲札稱官兵自初二日打仗是晚即

在山梁拏卡次日辰刻下山對賊卡拏營並將各

隘口派兵堵防初四日申刻圖桑阿俞金鰲所帶之兵到營適因大雨河水陡發不能進剿初五日寅刻剛塔差弁兵分路偵探賊情已刻該弁兵等回營據稱一路探至馬家堡賊匪已竄並無一人隨在馬家堡鐵葫蘆溝一帶搜獲山溝內避賊回民六人訊據供稱賊回見官兵勢大從轍家梁翻山黑夜奔逃不知去向等語適遊擊高人傑亦自馬家堡查探回營據稱堡內惟見空營一座虛設棍

棒叉靶並用木撐衣服裝作假人遊擊尋見馬驢  
踪跡沿山趕去賊回係由轍家梁翻山至鐵木山  
而遁提督等詢得鐵木山下即達安定官川急挑  
精壯滿漢兵一千名親自帶領追捕其餘弁兵  
令將備隨後帶領策應等因臣查賊人為官軍所  
敗竄入馬家堡並聞其掠食村庄仍回該堡似有  
死守之意提臣劉塔原帶兵二千名又圖桑阿俞  
金鰲續到兵八百名料足牽制賊人俟三四日內

西安滿漢兵到前後合攻賊自無從別竄不意賊  
匪見官兵勢大復乘大雨之後黑夜棄堡翻山而  
逃臣實深焦急坐立靡寧雖剗塔等業已帶兵跟  
踪追捕但賊在前而官兵尾其後如無前路堵截  
之兵縱使躡跡窮追仍虞四竄查西安官兵從東  
路而來係在賊前臣前已連次咨會將軍傅玉由  
會寧一帶迎剿現又飛催星速帶兵探明賊踪所  
向在前堵截遏其奔竄之路與剛塔等尾追之兵

合力圍剿庶可速為撲滅奏入

上命軍機大臣傳諭李侍堯五岱劉塔俞金鰲曰前以李侍堯等奏賊人所佔馬家堡前後左右三面俱係深溝大河惟堡後靠山居險恐別有路徑逸出早經慮及是以節次降旨傳諭李侍堯應即速赴該處會同劉塔等設法四面圍堵將出路悉行截住乃本日據李侍堯奏賊人果由山後逃逸不意竟如所料賊匪既有四五百人即由山後逃竄往東係平涼一帶往

西即係蘭州省會在在皆有地方營汛即或因賊衆不能擒捕豈有坐視賊匪經過不行稟報之理況甘省俱係土山人馬踪跡易于跟尋賊人斷不能插翼而飛何至不知去向今賊既紛紛逃竄所過村庄必肆行剽掠擾害良民甚而沿途勾結新教匪徒蔓延滋事尚復成何事體李侍堯身為總督並不親往調度惟安坐靖遠畏葸不前徒為傳遞文書之人劉塔係提督大員平時雖例聽總督節制職分本係平行非



屬員可比至帶兵進剿尤宜隨時相機辦理何得僅令弁兵偵探弁兵報之劉塔劉塔復報之李侍堯及至李侍堯札會再行派兵剿捕賊人早已遠颺且賊人既虛設棍棒裝作假人掩飾官兵耳目以為潛逃之計則山溝內所有回民六人安知非賊黨羽故為留下令其謊稱不知去向以緩官兵追躡其所稱轍家梁翻山至鐵木山此六人又何從得知劉塔何得信以為實既不星夜帶兵趕捕李侍堯又據文札虛辭

率行入告竟同夢囂李侍堯剗塔着傳旨嚴行申飭此時惟當會同五岱等上緊追擒四面圍剿以期稍贖前愆如賊匪不能按名拏獲惟伊二人是問恐該督等不能當此重罪也至五岱前據奏明留彼協剿節次奏摺內何以未經列名伊素嫻軍旅既留彼協剿自應領兵出力幫同剿捕五岱現在何處如何領兵打仗并賊匪日內曾否追獲各情形迅速馳奏以慰廑念

同日

上諭內閣曰據李侍堯奏接提臣劉塔咨稱據弁兵探得馬家堡內賊匪竄逃惟見空營一座搜獲山溝內避賊回民訊據供稱賊黑夜從轍家梁翻山至鐵木山而遁等語所奏大奇前因該督等奏馬家堡靠山居險朕即慮其翻山逃逸早經節次降旨傳諭並令李侍堯迅速親赴該處會同劉塔等四面嚴密圍堵務將賊匪全行剿殺毋使一名免脫乃本日李侍堯奏

賊匪果由山後逸出是朕先幾一動不意竟如所料而劉塔率領數千官兵在彼攻剿止向山前截殺並不慮及山後設法嚴防李侍堯則安坐靖遠並不親身前往相度機宜督率調度雖經朕屢降諭旨令伊等嚴防後路皆已不及朕惟自愧用人之不當耳前因賊首田五殲斃大局已定曾降旨將李侍堯交部議叙剛塔從優議給世職乃現在所存不過賊人餘黨竟不能及時剿滅致有逃逸之事是李侍堯剛塔不但無

功而且有罪所有議叙之處著停止仍令帶罪立功  
迅速追剿盡數擒拏如有一名漏網惟李侍堯剛塔  
是問仍俟事竣後核其功罪另降諭旨

五月十四日戊辰劉塔奏言臣等分撥官兵於初  
五日寅刻直至馬家堡賊營望見牆子週圍站立  
似乎人形隨督令官兵撲近細看皆係賊匪詭計  
用木棒撐罩衣帽營內並無一賊臣等隨令官兵  
跟踪追趕初六日辰刻至相距馬家堡七十餘里

之馬家灣地方拏獲賊人車朝明等七名據供俱  
係新教逆回潛來探聽信息並稱賊衆於初四日  
晚到馬家灣在賊首馬三阿渾馬如龍家中吃畢  
茶飯隨上尖山頂扎營初五日晚起程聽得賊人  
說要往安定又欲前往蘭州會寧等處搶掠等語  
臣等即將車朝明等犯正法隨派撥將弁分路前  
往追剿並拏獲馬三阿渾馬如龍之子及各賊目  
家屬男婦二十九名口解交督臣李侍堯嚴審辦

理其餘新教從犯家屬五十七名口一併即行正法  
臣等連夜督率官兵前往安定等處追剿逆回  
奏入

上命軍機大臣傳諭李侍堯劉塔俞金鰲圖桑阿曰  
據劉塔所奏總不成話賊人困守馬家堡官兵扎營  
圍攻自必相距不遠劉塔等非瞽目之徒何至於賊匪  
詭設人形熟視無覩致令乘間遠颺况昨據李侍堯  
奏接據劉塔圖桑阿俞金鰲扎會始知賊人逃遁之

信是彼時俞金鰲圖桑阿俱在該處帶兵何以本日  
摺祇係劉塔單銜具奏看此光景竟係俞金鰲圖桑  
阿以賊人奔竄視為與己無涉將追剿殺賊之事專  
諉之于劉塔伊等不過在彼協辦苟且塞責而劉塔  
又惟知遠聽總督調度並不即刻趕賊僅止搜拏犯  
屬送與李侍堯審辦李侍堯此時又仍然安坐靖遠  
惟以訊供為事竟如傳遞文書之人而于剿賊事宜  
似屬劉塔一人承辦竟與己無涉全不認真上緊趕



辦伊等彼此推諉寔屬大奇地方遇此等重大事件  
不特總督應親往籌辦即通省文武大員無不當實  
心出力視如己事何得稍存觀望俞金鰲係本省提  
督圖桑阿係本省副都統俱有剿賊之責因何摺內  
並不列名其意以為賊人業經竄逸任聽劉塔一人具  
奏將來得有卸過地步試思伊等果能卸過乎如賊  
人不能迅速按名擒捕非獨李侍堯劉塔不能當  
此重罪即俞金鰲圖桑阿亦必一律治罪並無分

別伊等豈不知朕辦理軍務從來嚴明無縱乎至閔  
劉塔等摺內現止該提督等在後大隊尾賊並不分  
兵遶出賊人前路迎頭邀截此時賊若往東至平涼  
一帶尚有傅玉所帶滿漢兵丁可以截拏使賊竟西  
向省城一帶又將使何路兵丁攔堵何以該督等摺  
內俱不籌及從前蘇四十三滋事正當該省營伍廢  
弛之時蘭州省會尚能保固無虞現在各營汛在添  
設官兵而省城為尤多豈可更任賊人往來搶掠滋

擾如行無人之境李侍堯等乃尚昏如睡夢安于  
畏懦全不籌慮及此竟以推諉為了事耶李侍堯  
劉塔俞金鰲圖桑阿俱著傳旨嚴行申飭至劉塔  
拏送賊回家屬皆係首從要犯黨羽不可不從嚴辦  
理以快人心李侍堯俟其解到即無分首從概予駢  
誅不可又存姑息之見

五月十五日己巳李侍堯奏言賊人於初四日晚  
間翻山夜遁嗣據安定縣陳善儀稟稱初六日辰

刻巡役鄉保報稱賊人五六百名已到尖山子或往安定縣或往西鞏驛不定臣查提臣等行抵馬家灣不見賊衆止搜獲匪犯六名及犯屬數十名口是官兵後至賊又先逃據安定所報尖山之賊看來即係馬家堡夜遁之賊旋據該縣稟稱賊人已至西鞏驛放火搶掠查西鞏在會寧安定之間相距各六七十里今提臣追剿之兵業已前赴安定而西安之兵計日當抵會寧賊若往擾會寧安

定正與官兵相值可以協力殲擒惟是賊踪詭秘

山徑叢襟往往官兵尾追賊先逃逸潛往各處勾

合匪徒

臣

查西鞏附近之紅土窪牛營店即有路

徑可至通渭伏羌恐其從此竄越已飛咨提臣劉

塔等或於所帶三千兵內或於西安兵內酌撥四

五百名派員帶領在要路預行堵截至提

臣

札稱

拏獲賊人家屬二十九名口押解靖遠審辦

臣

查

所解係要犯家屬自應槩予駢誅現在各路兵俱

已到齊臣札知提臣劉塔俞金鰲就近相機調撥  
派用臣有見到之處亦即隨時飛札知會辦理

同日李侍堯又奏言護軍統領五岱於五月初六  
日至靖遠臣以五岱久在軍營人亦老練查有涼  
州副都統圖桑阿帶來滿兵四百名昨圖桑阿已  
帶二百名前赴馬家堡尚留二百名在靖遠彈壓  
臣即令五岱帶此二百名滿兵前赴提臣劉塔等  
行營昨於初六日起程嗣接副都統噶達布札稱

亦經

奏明前來臣竊思現在各提鎮等會集剿捕辦理有  
人臣已札知噶達布仍赴新疆換班再提臣劉塔  
帶同涼寧二鎮兵進剿但該二鎮均受甘肅提臣  
節制綠營陋習往往區分彼此恐有指使不靈臣  
已札飭該鎮吉蘭泰蘇靈一體受提臣劉塔節制  
務期同心協力迅速成功

同日劉塔奏言

臣等由西華驛至杜家園子聞賊

人前往草茅溝馬營街一帶前去會合張阿渾臣  
等亦即自杜家園子督率官兵起程進剿途次據  
通渭縣知縣王懷專差飛報初五日未刻有縣屬  
大莊回民馬世雄報稱花陽凹一帶回民聚衆謀  
逆大莊回民馬建功馬良茂等俱已往投在石峯  
堡聚集又義崗鎮馬營監蔡家堡鄉保景祥等稟  
報寺子川地方石峯堡內四處回民聚集各執刀杖  
約計千餘人本處左近回民被裹一空各等情該處



與縣城近在咫尺城內並無兵丁防守請迅發兵  
五百名星赴通渭又據該縣稟稱縣屬南路虎狼  
溝有回民數百人聚立營盤又據西鞏驛軍台外  
委李左祥稟稱五月初六日已刻賊回到西鞏驛搶  
去驛馬及民馬共二百餘匹焚燒草場馬房並搶  
劫客民貨物未刻出城南去等語臣等查現在逃  
竄賊匪由官川一帶招集賊回多人又據通渭縣  
所稟賊匪一千餘人搶掠地方必須兼程前往

迅速追捕庶不致再有蔓延現在提督俞金鰲副都統圖桑阿先後俱至軍營會同進剿臣等挑選各營滿漢兵共一千四百名帶領星夜前進其餘疲乏兵丁派將備帶領隨後緩行以脩接濟均奏入

上命軍機大臣傳諭李侍堯曰據李侍堯到塔同日奏到賊匪自初四日馬家堡夜遁之後到塔於初六日追至馬家灣而賊人又已先竄搶掠西鞏驛等語賊

匪不過四五百人既已困守馬家堡剝塔帶兵數千  
名在彼剿捕乃一味懦怯無能又不知嚴防去路以  
致賊人乘夜潛逃肆行搶掠尚復有何顏面若再不  
努力向前剿滅賊回淨盡其罪更不可問至李侍堯  
仍復安坐靖遠並不親身急速前往督同追躡試思  
靖遠有何必不可離之勢賊人業經竄逸李侍堯向  
係有主意能為之人豈不知必應迅速設法擒拏况  
李侍堯既慮及總兵吉蘭泰等不受剝塔節制豈

不知伊係總督通省文武俱其統轄若親往調度何  
愁於此與其祇憑知會虛詞何不速去與剛塔面商  
妥辦殊不可解看來此時剛塔惟知在後尾追驅之  
肆出劫掠李侍堯前此則畏蒞不前乃至聞賊逃竄  
又復毫無措置失志慌張朕恐其辦理不能妥協已  
派福康安同海蘭察帶領巴圖魯侍衛福寧等馳驛  
前往會同剿辦現在李侍堯等轉不可張皇失措務  
安衆心為要如李侍堯有必不可離靖遠之勢則已

若該處逆犯家屬皆已正法此外無必需該督在彼料理之處即當遵照前旨帶兵星夜前往捕賊但不可又如剛塔之在後尾追亟需督率官兵分布左右繞至賊前四面堵截合剿方可速就撲滅不致滋蔓再據該督等奏稱西鞏驛號馬及民馬被賊搶去二百餘匹等語此皆該督等縱賊之過西鞏為甘肅東路驛遞衝衢文報往來皆由該處經過倘驛路或有梗塞尚復成何事體此事着責成李侍堯即速設法

安置妥協以達郵傳倘再有疎虞則該督更罪上加罪矣

上諭內閣曰李侍堯等於剿捕回匪滋事一案辦理未能妥協著派尚書福康安帶欽差大臣關防同領侍衛內大臣海蘭察帶領巴圖魯侍衛等分起馳驛前往會同督辦所有隨帶軍機處司員並著一體馳驛臣等謹案官兵追賊至馬家堡已如釜底遊魂倘周陸密布令其困蹙空山無難束手就斃乃

李侍堯安駐靖遠徒以審訊犯屬為辭憚於親往而剛塔惟在後尾追不知繞道迎截致賊人竄出肆掠是其縱賊貽誤咎有攸歸我

皇上以甘省督提諸臣不能了此事

特命尚書

臣

福康安帶同海蘭察等星馳前進俾得迅

速奏功仰見

睿算機宜其效有捷於影響者矣

同日

上命軍機大臣傳諭副都統噶達布曰據李侍堯奏現在會剿賊匪辦理有人已札知噶達布令其仍往新疆換班等語李侍堯此事又復錯誤此時剿辦逆回正當需人之際噶達布經歷戎行於軍旅尚屬曉悉且自請剿賊出力正宜留在軍營協同辦理何以轉令仍赴新疆想噶達布接到李侍堯札會其行程料必不遠著傳諭噶達布即速趕回會同剛塔五岱等帶領兵丁奮勉進剿並諭李侍堯知之



上又命軍機大臣傳諭阿拉善王寧夏副都統旺沁班  
巴爾曰現已派福康安同海蘭察等前往甘省進剿  
回匪從前勦辦撒拉爾逆回時旺沁班巴爾曾隨伊  
父帶領所屬厄魯特兵効力行走伊所轄之衆向習  
馳射較寧夏兵倍為得力著傳諭旺沁班巴爾即前  
赴遊牧處所於所屬厄魯特兵丁內挑選一千名親  
身帶領前往若福康安已到即協同進剿若到在福  
康安之先即同李侍堯進剿

上又命軍機大臣傳諭成都將軍保寧曰現已派福康  
安同海蘭察等前往甘肅保寧著即照前次勦辦撒  
拉爾之例將成都所屬屯練番兵內挑選一千名并  
派穆塔爾丹比西喇布等幹練員弁數人帶領迅往  
鞏昌安定協同福康安進勦賊衆

欽定石峯堡紀畧卷三